

Tajuk : Orang indu majak nyulut



Orang indu majak nyulut

“Orang indu ba menua tu mega dipeda chukup jampat mai diri ulih besemekih napi mayuh pengawa dalam mayuh bidang nambahka penyampau megai tanggung pengawa nyaup orang lelaki.”

PEHIN SRI HAJI ABDUL TAIB MAHMUD
Kepala Menteri Sarawak

ALVESTER BIGOL

KUCHING : Kepala Menteri Sarawak Pehin Sri Haji Abdul Taib Mahmud muji penyulut pengawa ke udah dikereja raban orang indu ba negeri Sarawak.

"Orang indu ke ba menua kitai udah chukup maju kenya menua udah medeka, sida dipeda landik ngaduka pekara rumah tangga sereta bebendar nulung ngangkatka menua nya-pai juluk ati nyadi menua maju," ku iya.

Iya madah munyi nya rambau bejadi Hari Orang Indu 2012 Peringkat Negeri Sarawak ke diatur Gerempung Indu Opis Menteri Pengintu Pendia, Orang Indu enggau Pemansang Ruang Bilik bepalan ba sebengkah hotel tebilang ba ditu, kemari (Hari Tiga).

Nangkan ke nya, iya madah pengawa senentang pekara politik ukai pekara ke senang dikereja orang indu laban diatu kelalu mayuh isu-isu ke baru. Taja baka, ku iya orang indu deka dipeda kering nengah kerejasama pengawa enggau orang lelaki.

"Diatu negeri kitai begunka mayuh orang ke landik ba pengawa teknikal kelebihan dalam bidang enjinir awakka engke-

man napi pengawa ke dipinta ba Koridor Renewable Sarawak Energy (SCORE).

Orang indu ba menua tu mega dipeda chukup jampat mai diri ulih besemekih napi mayuh pengawa dalam mayuh bidang nambahka penyampau megai tanggung pengawa nyaup orang lelaki," ku iya.

Dulu ari nya, Menteri Pengintu Pendia, Orang Indu enggau Pemansang Ruang Datuk Hajah Fatimah Abdullah madahka, penyulut orang indu kemaya hari tu endang patut dipebasa nengah pengelembing enggau pemisi orang indu ba mayuh palan pelajar ba negeri tu.

"Nitihka rikod statistik penyampau orang indu ke bisi nyambung pelajar ba Palan Pelajar Tinggi Awam (IPTA) iya nya bisi 70 ngagai 75 peratus.

"Ambika chunto, ba Universiti Malaysia Sarawak (UNIMAS) penyampau orang indu ke bisi ngerijista diri ungpak sesi rijista 2012/2013, penyampau orang indu aja iya nya 68 peratus. Penyampau orang indu mayuh agi orang lelaki ba semua lapan fakulti ; Ekonomi enggau Pengawa Dagang (68.6 %), Pengawa Berubat enggau Sains Pengerai (78.0%), Pene-

Sumber (71.3%), Sains Kognitif enggau Pemansang Mensia (76.3%), Sains Komputer & Teknologi Pemadah (52.7%), Sains Sosial (66.6%), Seni Gunaan enggau Kreatif (63.2%), nyengkaum fakulti Enjinir (53.0 %).


Penyampau orang indu mayuh agi ari sida ke lelaki ba semua fakulti lalu semina kurang mimit ba fakulti enjinir iya nya 44.6 peratus," ku iya.

Nitihka rikod mega, ku Fatimah penyampau orang indu seruan mayuh ari sida ke lelaki bala ba Universiti Teknologi Mara (UiTM), Politeknik enggau Palan Pematih Pengajar.

Nya nandaka, dudi hari ila orang indu deka mayuh agi landik sereta ulih nyaup nge-mansangka menua nyadi rayat ke ngembuan penatai pemisi ke besai, ku iya.

Beduduk ari nya, Fatimah ngelalau raban orang indu meseti ngambi peluang latih enggau agih belanja ke bisi disedia perintah baka ari Opis Betanam Betupi, Opis Pemansang Ekonomi Sarawak (SEDC), enggau Opis Amanah Rayat tauka MARA sereta gerempung-gerempung dagang ke besangkut paut.

Pengerami Hari Orang Indu 2012 Peringkat Negeri Sarawak taun tu berambaika



BERI PUJI ... Pehin Sri Haji Abdul Taib Mahmud enggau Datuk Hjh Fatimah Abdullah nandang bup 'Sarawak Women in Politics' ke baru dipenyadi beserimba enggau Hari Orang Indu 2012 Peringkat Negeri Sarawak ke diatur ba Kuching . • RAMIDI SUBARI

jaku "Wanita Penjana Ekonomi Baru, pendokong Semangat Kesukarelaan".

Beserimba enggau Hari Orang Indu taun tu mega, gerempung orang indu bisi meri empat bengkah gelar dikena meri peransang ngagai penyulut sida ke indu. Entara gelar ke diberi tu baka Gelar Kepala Menteri Nyulut Pekara Sosial 2012, Gelar Kepala Menteri Nyulut Indu Ba Pengawa Dagang 2012, Gelar Gerem-

pung Indu Pemadu Nyulut 2012 enggau Gelar Khas Indu Pemadu Nyulut 2012.

Orang ke mujur bulih Gelar Kepala Menteri Nyulut Pekara Sosial 2012 iya Puan Hajah Salmah Haji Ibrahim, Gelar Kepala Menteri Nyulut Indu Ba Pengawa Dagang 2012 diberi ngagai Puan Monica Then Then @ Choon Moi, Gelar Gerempung Indu Pemadu Nyulut 2012 diberi ngagai Sarawak Women For Women

Society (SWWS) enggau Gelar Khas Indu Pemadu Nyulut 2012 diberi ngagai Pandelega Rinong Pamg.

Ba pengujung pengerami mega, Pehin Sri Taib diberi basa bejadi bup ke ditempa Opis Indu enggau Ruang Bilik Sarawak. Bup nya dikumbai 'Sarawak Women in Politics'. Dala bup nya dipejuraika senentang pemendar orang indu ngereja pengawa sereta pengulih 22 iku orang indu

Sarawak ba pengawa politik. Sida tu nyengkaum tukuh politik ke udah lama enggau iya ke agi benung mangku pengawa ke maya hari tu.

Sama bisi datai iya bini Kepala Menteri, Puan Sri Raghad Kurdi Taib, Dato Sri Empiang Jabu, Datu Dr Adi Badiozaman Tuah, Penlung-Penlung Menteri, Tuai-Tuai Opis Perintah, Tuai-tuai Raban Bansa enggau Gerempung Ukai Perintah (NGO).